

Mazarin

3688

Songe d<sup>v</sup> roy ...

**RARE BOOK  
COLLECTION**



**THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL**

Mazarin  
3688

UNIVERSITY OF N.C. AT CHAPEL HILL



00023010466



688

# SONGE DV ROY.

Admirable & Prophetique pour la  
Consolation de la France.

*Arrivé le 15. de Mars 1649.*



A PARIS;

Chez CLAUDE BOUVILLE, rue des Carmes,  
proche Saint Hilaire au Lys Fleurissant.

---

M. DC. XLIX.



SON G F

D V R O Y

Admiral & Propriétaire pour la  
Compagnie de la France

Paris le 15 de Mars 1669



A PARIS

chez OLIVIER BOYSSONVILLE, Libraire de la Compagnie  
Proche Saint Pierre au 12 Boulevard

AN DE LA RE



# SONGE DV ROY

ADMIRABLE ET PROPHETIQUE

pour la consolation de la France.

*Arrivé le 15. de Mars 1649.*

**T**outes les choses du monde estant également inférieures à Dieu, pource que la distance qui les en éloigne toutes est infinie : Celles qui sont les plus belles, les plus excellentes, non plus que les autres, ne scauroient entrer en comparaison avec cet estre suprême de qui la nature Divine est infinie. Pour cette raison ie n'ose dire que la condition des Roys, plustost que celle des autres creatures soit approchante de la dignité de Dieu, deuant qui tout, n'est qu'un petit rien, tout égal. Cette égalité qui est tres-veritable à l'égard de Dieu, ne paroist parmy les hommes que dans leur commencement & dans leur fin, en quoy ils n'ont rien de dissemblable : Mais d'ailleurs Dieu s'est plus avantageusement communiqué, pour la suite de la vie, à ceux qu'il auoit de tout temps destinez & choisis pour gouverner. Il a fait en eux vne image viuante de sa grandeur, & a bien voulu que leurs Monarchies eussent du rapport & de l'analogie à l'Archetype celeste. Cette majesté des Roys, rayon visible de la Majesté inuisible, à l'esclat de laquelle, par un mouuement naturel les peuples fléchissent, & se portent à l'obeissance & à la soumission, en est un témoignage tres-sensible. Ils sont au dessus du commun, non seulement par leur dignité suréminente, mais encore par la consideration particuliere de leur personne, de qui Dieu semble faire estat : Il les fait Roys ; c'est par luy qu'ils regnēt ; il tient leurs cœurs en sa main, & les fléchit comme il luy plaist ; il leur donne des Anges tutelaires, qu'il tire des ordres Superieurs ; & le Ciel semble auoir pour eux des influēces particulieres. Toutes ces graces qui découlent sur les Monarques pour la conseruation d'eux & de leurs Estats, ont esté largement répandues sur nostre Roy. **DIEU DONNE :** Dieu l'a donné aux prieres pressantes



de toute la France, & luy a imprimé au moment de sa naissance le caractère des plus benignes influences, que la meilleure conioncture des Astres eust pû produire. Aussi il agira par des mouuemens tous celestes: Et la reuelatiõ qu'il a eüe par son Songe comme vne grace speciale pour la consolation de ses Subiets, en vn âge auquel il ne peut encore de luy-mesme pratiquer son autorité, luy promet des instructions diuines à l'aduenir pour luy mesme & pour le gouuernement & la conseruation de cette Monarchie: Et nous assure que si Dieu iusques icy a permis beaucoup de maux pour nous chastier, s'il nous a affligez de verges & de scorpions, maintenant son ire s'appaïse & qu'il nous va releuer sur le penchant de nostre ruïne.

C'est ce qu'il a bien voulu declarer au Roy par ce Songe prodigieux, dont les mysteres, leur explication & les éuenemens font & feront paroistre qu'il n'est pas de ces chymeres qui viennent de la phantaisie agitée, ou de la predominatiõ de quelques humeurs, ou du ressouuenir de ce qui s'est passé la iournée; mais vn pur effect de la bonté Diuine, qui par cette grace qu'il a faite à nostre ieune Souuerain veut r'asseurer nos esprits abbatus d'vne esperance infailible de la deliurance de nos maux.

Le Roy auoit passé vne partie de la nuit avec beaucoup de tranquillité, & les heures estoient escoulées pendant lesquelles les vapeurs de la refection iointes à l'idée toute fraische des mouuemens ou des actions du iour peuuent trauailler les sens interieurs pendant l'assoupissement des autres; Lors que sur le matin les gardes apperceurent que son repos estoit troublé par quelques agitatiõs extraordinaires. Si le respect n'eust esté extrême, ou plustost s'ils n'eussent veu que ces agitatiõs cessioient presque aussi-tost qu'elles commençoient de paroistre, sans doute ils l'eussent voulu tirer de peine, & par leur zele indiscret nous eussent priuez de la connoissance que nous auons du sujet de nous réioiyr. Ils s'éueillèrent en fin en proferant quelques paroles assez haut, & s'estant trouué en sueur, fut obligé, apres s'estre remis, de donner à la sollicitation de ceux qui ont l'honneur d'approcher de sa personne, le recit de ce qu'il venoit de voir.

Au commencement de son Songe, estant assis dans vn champ plein de delices, sur vn throsne vn peu esleué au dessus de la place que tenoit près de luy vne Dame vestue à la Françoisse, ancienne, mais pleine de majesté plus que d'aage, sur les espauls de laquelle  
il auoit



5  
il auoit son bras droit appuyé; Il estoit en posture pour prendre vn repos parfait, s'il n'eust esté importuné par vn grand nombre de Vautours, de chiens, de chats, de rats & autres vermines ou insectes, qui avec vn bruit estrange s'entredéchiroyent les vns les autres. Il s'en vouloit fâcher, lors qu'il veid de loing venir vn homme qu'il n'a pas voulu nommer. Il le connoissoit bien, mais estant proche de sa personne il ne le reconut plus; Il ny voyoit rien d'humain que la face, encore auoit-il des difformitez monstrueuses en ses dents; & les autres parties de son corps sembloient estre des parties des animaux les plus farouches & les plus dangereux. Quoy que ce monstre les cachast avec grand soin d'un grand manteau qu'il portoit sur ses espauls, le Roy ne laissa pas d'en estre effrayé. Il demandoit à sa Dame ce que cela pouuoit estre, elle plus morte que viue ne luy pouuoit respondre: Dans ce trouble il l'appella cent fois, tantost sa bonne mere, tantost sa pauvre fille, & enfin il tira de sa bouche cette parole, c'est Mantichora, nous sommes perdus.

Cette beste farouche voulut flatter le Roy, & par quelques gesticulations ridicules vouloir diuertir sa frayeur; lors qu'il fut obligé par les cris lamentables de cette pauvre desolée de l'embrasser estroittement, & puis de la defendre par toute sorte d'efforts, de ces vermines, qui apres tant de bruit, d'un commun accord, par vn signe du monstre, s'estoient ruées sur elle. Ce Mantichora les acharne & les halle de plus en plus, ces bestes donnent mesme sur le Prince, & desia la miserable Dame auoit tous ses vestemens déchirez & son corps outragé & ensanglanté en toutes ses parties, & le Monstre d'une gueule beante, sembloit la deuorer toute entiere; Lors qu'ils virent sur le fleuve le plus beau du monde, dont les ondes mouilloient le pied du throsne, venir droit fil à toutes voiles, vn Nauires qui portoit Themis & Mars. D'arriuée cette majestueuse Princesse, fille du Ciel & de la terre, outrée de cholere, monstre à Mars ce spectacle qui le deuoit animer à la vengeance. Le Monstre eut l'audace de faire resistance, se sentant frappé, il vomissoit autant de feu que de sang, & tantost tournant sa rage mourante sur cette pauvre Dame, il luy donnoit encore de furieuses atteintes; & tâtost voulant fuir, il dardoit de sa queue, qu'il auoit semblable à celle d'un scorpion, des aiguillons tresdangereux. Pourtant il fut bien-tost escartelé, & les autres bestes presque en mesme temps, sinon celles qui estant les moindres, se



trouuerent au dessous de ces coups foudroyants, & qui se perdirent à la fuite. A l'instant tout l'orage fut calmé, & Mars tout glorieux d'auoir rendu ce seruice au Roy son cher nourrisson, aussi bien que Themis rauie d'auoir secouruë si à propos l'illustre affligée, les consoloient l'un & l'autre, & rassureoient leurs esprits par l'assurance qu'ils leur donnoient d'une inseparable compagnie. Le Roy plein de ioye se ietta au col de sa Dame, & elle avec une respectueuse soumission luy tenoit les genoux embrassez: Le Roy en s'éueillant sembloit la releuer; Et comme il pensoit encore la regarder fixement, trouuoit qu'elle auoit recouuert tout l'embonpoint d'une florissante ieunesse, & tout esueillé profera ces paroles, Qu'elle est belle, & qu'elle me semble changée depuis vn moment!

Ouy, chers Compatriotes, voila nostre chere patrie raieunie: Mars & Themis, c'est à dire Dieu qui dispense les fortunes de la guerre, & qui fait iustice aux petits & aux grands, la deliurant de ses persecuteurs abiects & infames; Elle va recommencer le cours de sa vie par vn periode nouveau, & elle florira plus que iamais. Il ne faut point de Daniel pour assurer de cette verité: Nous voyõs le Roy assis aupres de sa bonne France, leur posture marque ce qu'ils se doiuent l'un à l'autre, dont l'explication ne seroit pas icy hors de propos, si elle n'estoit trop longue & trop ambaraissant pour ce petit discours. Leur iouissance mutuelle a esté troublée par la rage de ces animaux qui s'entremangeoient. Cette consideration se peut rapporter à la troisieme partie de la vision de Chilperic quatrieme Roy de France, par laquelle la Roine Basine luy faisoit voir l'estat futur de ce Royaume. Je la peux escrire icy apres les bons auteurs qui l'ont remarquée. Les geãs, les lyons & autres qui luy parurent au commencement, c'estoient les Roys mesmes, qui souuent au commencement de cette Monarchie, pendant les premiers siecles, estans plusieurs dans la France heritiers d'un mesme Royaume qu'ils auoient à diuiser en plusieurs, se sont disputez l'estenduë ou la iouissance de leurs domaines aux despens de la pauvre France: & c'estoient encore les autres Princes & les Puissans, estrangers ou du dedans qui l'ont desolée par leurs rages. Les loups & autres approchans de cette nature, marquoient les mouuemens seditieux & principalement les ligues causées par les heretiques, qui se doiuent nommer les lups voraces de l'Ecriture Sainte. Et pour cette derniere partie



de la vision, ces vermines ne sont-ce pas ces maudits Publicains, Partisans, Maletostiers, Monopoleurs, Engeance de viperes, tirez de la lie du peuple & la plus basse, & de celle encore, qui par quelque chose d'execrable, auoit ou fraichement ou de long-temps peut-estre meritée la malediction de Dieu pour les produire. Que n'ont-ils point fait pour la ruine de la France ? Mais le cœur me faigne & ie n'ose m'engager dans ce discours, il faut que le Lecteur m'en excuse & aye recours à ce qu'en ont escrit des plumes meilleures que la mienne.

Pour le Mantichora, il faut que ce nom luy demeure, puis que le Roy ne l'a pas voulu nommer autrement, on sçaura assez à qui cette figure s'applique, pensez seulement à cette description. Il a trouué ces bestes aupres du Roy, & les a acharnez sur la pauvre France, qu'il auroit luy-mesme deuorée toute entiere. Aussi est-ce vn monstre qui a vn appetit singulier pour la chair humaine: Sa face & ses oreilles semblent celles d'un homme, il a trois rangs de dents haut & bas, avec les yeux pers, la voix semblable au ton de trompe, le's pieds & quelque chose du corps comme vn lyon, avec vne queue comme celle du scorpion de terre qui picque, & quida de mesme des aiguillons qu'il a d'abondant avec beaucoup de venim, il va comme vn cerf, & est si farouche qu'il ne se peut iamais appriuoiser.

Ce beau nauire qui est les armes & la figure de la ville de Paris, nous ne le verrons pas eschoüer contre vn si miserable écüeil. Cette Syreine n'a plus de voix pour enchanter ou endormir: Le vaisseau va à pleines voiles, & Dieu en est le Pilote vigilant & l'armement mesme: Il porte Themis & Mars, que tout le monde sçait que l'antiquité mesme a reueréz, Themis pour la Deesse de la iustice, & Mars pour le Dieu de la guerre, donnant le nom de Dieu à ce qui n'estoit que diuin: Aussi est ce de Paris que sortent ces deux puissances pour exterminer les ennemys du Roy & de la France. La pauvre France qui vieillissoit auant son temps par tât de malheurs & de tourments qu'elle a soufferts, s'est venue en effet aussi bien que dans ce songe, exposée à tous ces impitoyables monstres, & deschirée par leur rage. Le Roy mesme a en part à ses maux, pource que le Roy est la teste de son Estat, & chaque membre ayant place en ce corps, ce corps ne sçauoit souffrir en aucunes de ses parties, que le sentiment n'en remonte à cette partie superieure, qui dans l'Estat, comme dans le microcosme, qui



est l'homme, se peut appeller le siege du sens commun.

S'en estoit fait sans ce favorable secours: mais nous verrons nos ennemys terrassez & l'Estat fermement restably. Et si l'on pense à la vision de Chilperio, que ce soit seulement en ce sens, c'est que la France varenaistre comme vn autre Phœnix, non pas de ses propres cendres, mais de celles de ses ennemys.

Sus donc Themis, vous ne voyez que trop le peril effroyable: puisque vous faites vn des bras du Prince, ne manquez pas à vous bien employer pour sa protection. Mais vous braue Mars & vous principalement genereux tutelaire de la France, à qui appartient en propre le soin & la conseruation du Roy, puisque vous en auez esté chargé comme d'vn sacré dépost, tirez le des griffes de ce monstre, defendez le patrimoine de ses ayeuls contre ceux qui en sont vsurpateurs aussi bien que de son autorité; rendez à la patrie sa premiere splendeur, & faites que nous ressentions en nos iours le bon-heur passé de nos peres.

F I N.







